

PROXECTO DE DECRETO /2016, de _____, polo que se regula a concesión da distinción de Embaixador Gastronómico de Galicia.

Galicia é unha referencia gastronómica a nivel nacional e internacional. A calidade e variedade dos seus produtos, o respecto as súas tradicións culinarias, a innovación constante e o traballo que día a día realizan os profesionais da cociña conformaron toda unha filosofía que fixo da gastronomía galega un importante motor da economía da nosa terra.

Galicia conta cun importante número de festas gastronómicas que louvan as excelencias da nosa cociña, e das cales un total de 51 foron declaradas oficialmente de interese turístico pola súa gran capacidade de atracción de visitantes. Por outra banda, un 25 % dos turistas que nos visitan cada ano anotan a gastronomía como a principal razón pola que elixen a Galicia como destino turístico.

Conscientes desta realidade a Axencia Turismo de Galicia incluíu a enogastronomía na súa Estratexia de Turismo para o 2016, sinalándoa como un valor esencial para afrontar o reto de *“posicionar a Galicia como marca e como destino diferencial a nivel interno, nacional e internacional”*. A complementariedade do produto turístico enogastronómico co resto dos produtos turísticos galegos obriga a considerar toda actuación neste senso como unha prioridade da política turística.

Dentro das liñas de traballo que se establecen para desenvolver esta Estratexia de Turismo contémlase un programa específico para a promoción do turismo enogastronómico e de Galicia a través de prescriptores de opinión.

É neste eido de actuación no que se enmarca a designación de persoas ou institucións de prestixio que poidan axudar a difundir e exportar a marca e o destino Galicia. Por todo o anterior, dado que a imaxe de Galicia non só se transmite ao través de campañas xenéricas de promoción, polo que se fai necesaria a creación dunha figura que permita

que persoas ou institucións, relevantes no ámbito da gastronomía, poidan converterse en embaixadores gastronómicos de Galicia.

Na súa virtude, por proposta conxunta do vicepresidente e conselleiro da Presidencia, Administracións Públicas e Xustiza, da conselleira do Medio Rural e da conselleira do Mar, tras a deliberación do Consello da Xunta de Galicia na súa reunión do día.....

DISPOÑO

Artigo 1. Obxecto

1. O obxecto do presente decreto é a regulación da concesión da distinción de Embaixador Gastronómico de Galicia.
2. O obxectivo da distinción de Embaixador Gastronómico de Galicia é contribuír á promoción do turismo de Galicia, a través da promoción dos produtos alimentarios e a gastronomía de Galicia no ámbito nacional e internacional, preservando e poñendo en valor o patrimonio dos produtos alimentarios de Galicia e fomentando os valores económicos, culturais e sociais da cultura gastronómica galega.

Artigo 2. Requisitos

A distinción de Embaixador Gastronómico de Galicia poderá outorgarse á persoa, entidade, asociación ou colectivo que, no seo da Comunidade Autónoma de Galicia, contribúa dun xeito singular á dignificación, mellora e promoción dos produtos alimentarios e a gastronomía de Galicia.

Artigo 3. Modalidades

Existirán dúas modalidades de Embaixador Gastronómico de Galicia, que se outorgarán anualmente:

- a) Individual, que se outorgará a persoas físicas ou xurídicas.
- b) Colectiva, que se outorgará a colectivos.

Artigo 4. Compromisos do Embaixador Gastronómico de Galicia

Os Embaixadores Gastronómicos de Galicia comprométense a colaborar para:

- a) Difundir os valores propios da cultura dos sectores produtivos alimentarios galegos.
- b) Dar a coñecer os produtos alimentarios e a gastronomía de Galicia en restaurantes de referencia a nivel nacional e internacional.
- c) Facilitar o establecemento de novos canais de comercialización para os produtos alimentarios de Galicia.
- d) Acercar ás figuras relevantes no mundo da cociña ao coñecemento da cultura enogastronómica galega.
- e) Potenciar e dar a coñecer os produtos galegos de calidade diferenciada.

Artigo 5. Concesión

1. A distinción de Embaixador Gastronómico de Galicia será outorgada por resolución da persoa titular da Dirección da Axencia Turismo de Galicia.
2. A Axencia Turismo de Galicia realizará anualmente unha convocatoria na que se fixarán os prazos de presentación de candidaturas para as modalidades previstas no artigo 3 do decreto.
3. As persoas, entidades, asociacións e colectivos galegos vencellados ao sector alimentario e gastronómico galego, poderán presentar diante da Axencia Turismo de

Galicia, as candidaturas razoadas a Embaixador Gastronómico de Galicia, en nome propio ou de terceiros.

Artigo 6. Presentación de candidaturas

Coa presentación de candidaturas deberá achegarse a seguinte documentación:

1. Identificación da candidatura: nome da persoa ou entidade á que se refire, enderezo, NIF, teléfono e persoa de contacto.

No caso de que se propoña a candidatura dun/dunha terceiro/a, nome da persoa ou entidade propoñente, NIF e teléfono e correo electrónico.

2. Memoria explicativa da candidatura proposta.

3. Poderán acompañarse tamén, se se considera oportuno, apoios á candidatura proposta e, en xeral, cantos datos ou información que se considere axeitado para fortalecer a proposta.

Artigo 7. Emenda de candidaturas

1. Se as candidaturas non acompañan a documentación necesaria contida no artigo anterior, requiriráselles aos/ás propoñentes que as emenden no prazo de dez días, con indicación de que, se así non o fixeran, se lles terá por desistidos/as da súa petición, previa resolución ditada nos termos previstos na normativa reguladora do procedemento administrativo común.

2. En todo caso, a documentación presentada non será devolta.

Artigo 8. Xurado

1. As candidaturas admitidas serán avaliadas por un xurado coa seguinte composición:

Presidente/a: A persoa titular da Dirección da Axencia Turismo de Galicia

Secretario/a: Un/unha funcionario/a da Axencia Turismo de Galicia

Un/unha vogal en representación da consellería con competencias en materia de pesca e acuicultura.

Un/unha vogal en representación da consellería con competencias en materia de agricultura.

Un/unha vogal en representación da Academia Galega de Gastronomía.

Un/ unha vogal en representación de Galicia Calidade.

Un/unha vogal en representación da Axencia Turismo de Galicia.

Un/unha vogal en representación dos Consellos Reguladores dos produtos alimentarios galegos de calidade.

2. Os membros do xurado poderán ser substituídos polos membros suplentes que se designen.

3. O voto deberá emitirse persoalmente por cada un dos membros do xurado durante as xuntanzas formais que este celebre. En caso de empate decidirá o voto do/a presidente.

4. Das reunións do xurado deixarase constancia en acta, de conformidade co disposto na Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

5. As candidaturas que obteñan a maioría dos votos do xurado, para cada unha das modalidades, serán comunicadas á Axencia Turismo de Galicia para o seu nomeamento como Embaixador Gastronómico de Galicia.

Artigo 9. Acreditación

1. Para acreditar o outorgamento do título expedirase un diploma acreditativo do seu nomeamento no que se fará constar o recoñecemento expreso da sociedade galega a súa dedicación na defensa e promoción da gastronomía da nosa terra.

2. Este título terá carácter exclusivamente honorífico, non derivándose da súa posesión dereito administrativo ou económico ningún.

3. Os Embaixadores Gastronómicos de Galicia participarán nun lugar preferente nos actos de exaltación e promoción dos produtos alimentarios de Galicia organizados polas consellerías competentes en materia do medio rural e do mar, así como pola Axencia Turismo de Galicia.

Así mesmo, poderán ser consultados pola administración nos ámbitos turístico, económico, cultural, e social da cultura gastronómica galega.

Artigo 10. Acto de entrega

Acordada a concesión, a persoa titular da Presidencia da Xunta de Galicia entregará o título nun acto solemne.

Artigo 11. Revogación da distinción

As distincións concedidas poden quedar sen efecto por resolución da persoa titular da Dirección da Axencia Turismo de Galicia, cando de forma motivada e por causa sobrevida así se xustifique por razóns que puidesen supoñer un desprestixio das funcións encomendadas.

Disposición derradeira primeira. *Habilitación normativa*

Facúltase á persoa titular da Dirección da Axencia Turismo de Galicia para ditar cantas resolucións sexan precisas para a execución do disposto neste decreto.

Disposición derradeira segunda. *Entrada en vigor*

O presente decreto entrará en vigor o día seguinte ao da súa publicación no Diario Oficial de Galicia.

Santiago de Compostela,

Alberto Núñez Feijóo

Presidente

Alfonso Rueda Valenzuela

Vicepresidente e Conselleiro de Presidencia, Administracións Públicas e Xustiza